

Al laour per na nuova gramatica fodoma

Proget del Istitut Cultural. Doi comiscion mpegnade a revijioné chëla de Padre Adalberto Pellegrini

Cultura - Grazie a nen proget del Istitut Cultural Ladin Cèsa de Jan l'é ste nvié via l gran laour de mète ju la nuova gramatica fodoma. N realté se tratarà de to a mán e modernizé chëla metuda ju da Padre Adalberto Pellegrini e publicada ncora ntel 1974 da l'Union dei Ladins da Fodom. Na bona gramatica, a dita de troc esperc, fata scialdi polito, ma che oramei la sent l peis dei cambiamenc che l'é ste nte oramei cuaji caránta agn. Souradut per via de la grafia che l'é scialdi cambiada per via che ades a scrive se doura l computer, ma ence per n'evoluzion che a porté a la decijion, per pratizieté plucheauter, de tò via o njonté chelche sen o l auter su le parole. Ma sarà ence debujen de njonté ite

velch per la fe devente plu aggiornada e n linea con chële de le val ladine del Sela, che nte sti agn i é stade da spëss mudade grazie al fat che l Ladin cafòra l ven nsigné nte scola e l ven douré trop deplù ntei media, nte publicazion, nte la vita social da vignidì e nte l'ministrazion publica. L laou l vignarà coordiné da la Nadia Chiocchetti de la Val de Fascia, linguista, gran esperta nte chëst ciámp ma che souradut che la cugnësc polito l Fodom perciéche la l a studié fora dassën e l'a bele fat plu oute i corsci per l personal de l'aministrazion de comun grazie ai progec finanziaiei da la Lege 482/99 per le mendrânze. L laour l'é ste spari su nte doi comiscion. La pruma la fajarà le proposte de revijion de le pert de la gramatica: dal sostantif,

al articol, al agetif e coscita nnavánt. La secondo grop l se cruziarà de le descòre fora. Ulache vignarà fora i dubi e le perplessité, la comiscion la jiarà a sentì la jent de temp o esperc de chël setor che a da ci fè con chëla parola. Per ejemple se no s'é segur de vèlch che a da ci fè co la ciacia o la natura se jiarà a damané coche se disc ai ciaciadous. Le doi comiscion le s'à bele biné nvalgune oute st'aisciuda. L prum grop l se ciapa na outa a la setemana. L secondo ogni doi per laoré fora chël che a dezedù l prum. Le riunion le jiarà nnavánt per duta l'aisciuda, le lasciarù su d'isté e le scomenciarà ndavò via per l auton. Se trata de segur de n gran laour, difizile ma ence apascionánt, che mpermët de giavé ca e mparé parole e inoms scugniscius per Fodom, ma che mostra ence duta la richëza de nost lingaz. Che no l'é lié per nia demè ai laour e a la vita da nviade, ma nte suo lessich l a parole che ben po ester dourade per di fora conzec de atualité d'alidancuoi. L vare davò sarà chël de publiché la nuova gramatica a na moda da podei la mète a dispozizion de le scole e de duc chi che a pascion e i e ten a tignù su co l scrive nost bel lengaz fodom. (ls)



Una de le doi comiscion al laour per cialé ju la nuova gramatica fodoma.